

Minister Dowers:

Den FMAA mescos cu otro fundacion, mester a corta gasto

ORANJESTAD – Minister di Husticia Arthur Dowers lo bay sinta cu e fundacion FMAA cu ta encarga cu e cuido di adictonan cu diferente problema na Aruba. Ayera Bon Dia Aruba a publica cu pa motibo di falta placa nan mester manda adictonan bek riba caya. Segun e minister e medidanan tuma ta pa corta gasto.



E ultimo desaroyonan den FMAA no ta mucho bon segun informacion ricibi for di e director. Banda di 25 adicto cu problema serio cu mester bay bek riba caya, empleadonan tambe ta wordo manda cas y tampoco por tuma mas persona. Sr. Dowers no a elabora mucho riba e hecho cu 24 hende lo ta bay cas e aña aki for di FMAA di cual mayoria ya a bay caba.

E consecuencia di esaki segun director di FMAA Jerehm Campbell ta cu no por sigui brinda e servicio optimal na clientenan. Por ehempel mester a cera e cas di pa hende muhe. E hecho cu tin clientenan cu a wordo poni bou curatela pa Ministerio Publico lo no wordo interna ta parti di e problema cu tin aworaki, segun e director. Tin 5 sentencia cla (hues ta pone nan bou

di curatela) y 15 ta den proceso na Ministerio Publico.

Bon Dia Aruba a puntra sr. Dowers riba esaki cu tambe ta pone adictonan bou curatela riba caya. Un medida cu gobierno a tuma den pasado pa baha e molester di adictonan riba caya.

El a bisa cu no ta e caso cu ta pone e adictonan aki bek riba caya, pasobra Ministerio Publico ta traha a base di e cantidad di espacio cu tin pa interna personanan. “Si ta e caso cu nan no por opera cu e cantidad di persona cu tin actual, lo purba mira unda por drecha esaki y si tin e posibilidad pa yama algun hende bek den funcion.”

Falta personal

Marjorie Vermeer (riba potret) cu ta forma parti di FMAA ta splica cu di 45 persona interna na Centro Colo-

rado, mester a manda 25 di adictonan cas, kende a wordo trata cu ta bayendo riba bon caminda. “A pesar di esaki nan lo no por biba riba nan mes. Pero nos no por duna nan e cuido mas pasobra no por sigura e seguridad di e trahadonan. E no ta posibel pa pone poco hende cuida e adictonan como cu un persona adicto ta un persona malo cu por haci daño na e personal y na su mes.” Banda di esaki tin e cas di hende muhe cu a menciona cu 10 hende muhe cu tambe lo mester sali pa motibo cu mester cera pa falta di personal.

Situacion ta conoci

Varios biaha e fundacion a papia cu minister Dowers y e ta na altura di e problemanan. E sa cu e problema ta grandi pero ta bisa su mannan tambe ta mara, segun sra. Vermeer, pasobra gobierno mester corta den su gastonan. Pa motibo di esaki varios manager mester wordo manda cas cual ta ocasiona cu e centronan tampoco por wordo maneha mas. E cortamento di gasto no ta algo cu a papia riba dje desde awo, ta algo andando ya pa basta tempo, sra. Vermeer ta duna di conoce. “E situacion a bay poco straño, pasobra e empleadonan nan salario a wordo paga dobel cual a duna nan in-

dicacion cu nan ta wordo kita. Pues cu nan contractonan ta wordo finalisa.” FMAA ta un fundacion pero e gastonan di salario ta cay bou di gobierno. E momento cu nan bisa cu no tin placa y ta manda hendenan cas manera locual cu a pasa, automaticamente mester cera, sra. Vermeer ta splica.

Efecto directo pa comunidad

Den e caso di FMAA e efecto di corta gasto ta diferente cu otro fundacionnan na Aruba pa motibo cu e clientenan lo bay directamente riba caya y cu tur consecuencia (negativo) cu esaki tin pa Aruba. Manera antes e adictonan lo ta riba caya bek y esaki tampoco por crea e mesun situacion manera antes, unda nan ta causa molester den centro di ciudad. Y awor cu e centro a wordo renoba, esaki sigur lo haya su consecuencia negativo, Bon Dia Aruba ta compronde for di e fundacion.

“Full Aruba incluyendo nos bishitantenan lo sinti e efecto”, sra. Vermeer ta bisa. Finalizando e ta haya si cu pueblo mester tene consideracion cu e personanan aki como cu nan tambe ta hende y tin famia. Segun e, e problema aki no ta di gobierno so pero di comunidad. □